



GABRIEL FUNDACION FLORES

“FUNDACION GABRIEL FLORES” a keda estableci oficialmente 16 di februari 1999 na oficina di Notaris Mr. Maria Albertina Eman.

E fundacion ta hiba e nomber di **“FUNDACION GABRIEL FLORES”** na memoria di e fayecido hoben musico Arubano **Gabriel Flores**.

Gabriel Flores conocido cantante, compositor y arreglista cu a fayece dieztres (13) aña pasa, awe lamentablemente no ta hunto cu nos pa por mira un di su soñonan bira realidad cual ta e Fundacion, unda nos artistanan local lo haya tur atencion y balor cu nan merece riba nan propio pais.

Gabriel Flores, cariñosamente yama Gaby of Gabichi tabata un hoben cu for di chikito semper tabatin musica na su curazon. Un hoben cu semper tabata dispuesto pa copera y duna su aporte riba tereno musical, cultural y social. Un artista Arubano cu a studia y a gradua na Berkleys College y a bira un artista di nivel internacional.

Pa sigui cu e trabou cu Gaby, no a haya e oportunidad na bida pa por a termina, a lanta e **“FUNDACION GABRIEL FLORES”** cual tin e tarea di promove, duna apoyo y balor na nos cultura cual ta e patrimonio di nos Aruba entre nos musiconan.

Como musico cu semper a lucha pa bay dilanti cu pensamentonan grandi, vision, talento natural, y semper cu un sonrisa riba su cara y cu su don humanitario, cla pa yuda un y tur, Gabriel a cuminsa cu e proyecto di duna les den barío hunto cu otro musiconan.

Atravez di e fundacion nos lo continua cu e labor di yuda nos talentonan den tur barío pa di e forma aki logra cu tur hoben por alcansa nan soño di bira un musico.

Awe nos kier recorda **Gabriel Flores** y demonstra cu cada un di nos musiconan ta merece e reconocimiento aki, den nan pais Aruba.

E fundacion aki tin un compromiso cu nos musiconan y tur e futuro musiconan di nos pais Aruba.

Den e vision y mision aki tambe nos tin nos hobennan cu tin deseo di studia musica y practica esaki riba nos isla.

Fondonan cu lo wordo crea pa medio di e Fundacion lo ta disponibel pa tur instancia cu ta traha cu mucha den e barionan, pa promove e musica di nos dushi pais Aruba.

Intencion ta pa yega cu musica den tur bario di Aruba y siña principalmente e hobennan e balor di musica y e mundo fascinante di musica como parti di nos cultura.

Intencion ta pa yega na un sede pa e “**FUNDACION GABRIEL FLORES**” cual lo bira e cas pa nos artistanan Arubano y na unda nos por expone y documenta historia y trayectoria di nos musica y musiconan.

E deseo di e fundacion ta: pa tur amigo, conocirnan, musiconan, medionan di prensa, Ministerio di Cultura y pueblo di Aruba en general pa contribui cu e nobel causa aki na memoria di nos gran amigo musico **GABRIEL FLORES**.

Ban uni forza y apoya nos baluartenan musical cu den pasado y den presente semper a duna y lo sigui duna nan aporte na Aruba su cultura, reconociendo talentonan di cada un i nan esfuerzonan.

Nos ta termina cu e frase:

Cada yiu di Tera mester wordo reconoci riba su tera y dun’e e balor cu e merece riba su mesun Pais.